



UNIVERSITÄTS-
BIBLIOTHEK
PADERBORN

Universitätsbibliothek Paderborn

Historia Missionis Anglicanæ Societatis Iesv

More, Henry

Avdomari, 1660

Ioannes Floydus. n. 41.

urn:nbn:de:hbz:466:1-38320

inter eius temporis Iudices primus, cum ad possessiones Southcotti inuadendas anhelaret, omni arte moliebatur *Henricum* conuincere de Sacerdotio, modò per examina inquirendo, modò blandis promissis alliciendo ad fatendum quod res erat, modò per falsos fratres & Apostatas obseruando an hominem nosset, quæ omnia *Henricus* prudentiâ & cautione elusit, & se hospitemque suum præstitit immunem. Amotus Londino ad Arcem Framingamiensem in Comitatu Suffolciensi, sub finem Elizabethæ exul migravit Olyssiponem, vt quos posset Iustitiores Anglos ad Ecclesiæ gremium reduceret: Illis contrâ, libertati & vitæ eius post puluerariam conspirationem detectam insidiantibus, & graues querelas apud Gouernam Præpositum domus Professæ deponentibus; quas à nimium credulo Romam delatas ipse diluit; Et rursus in Angliam proficiscens diuertit Audomarum, hæsitque ad annum Præfectus Spiritus. In Insulam deinde rediit, iterum iterumque captus modò in Atrio Wintoniensi, modò in Fleeta detentus est, vbi cum crebris ægri tudinibus penè conficeretur, Regina Caroli tempore intercedente libertatem consecutus est tantam vt ab inferenda illi molestia, vel ijs apud quos diuerfaretur vniuersi prohiberentur. Quæ immunitas vt alijs etiam esset utilis, animum adiecit ad ipsos Apparitores delatoresque comprimendos; numeratisque eorum artificijs quibus pecuniam ab Catholicis & Sacerdotibus emunctam in vltus suos conuertebant, (quæstui habentes munus quod ad Sacerdotes extirpandos acceperant) potestate exutos in ordinem redigi curauit. Quæ si cogitationem cuiuspiam afferant non esse tam atroces Catholicorum Sacerdotumque ærumnas quàm à multis describuntur, intelligat distinguenda esse tempora: Prouidet enim Deus, quædam quandoque interualla, vt in prima Christi Ecclesia, & in illis mitioris homines ingenij, nè tenso semper arcu Catholici animis frangantur & langueant; tum rursus ad certamina prouocat, vt cumulatius coronentur. Ille vir strenuus, & ad vltimam vsque senectutem laboriosus indefessusque vitam cum meliori commutauit Londini; Professus quatuor votorum ab anno sexcentesimo decimo.

Ioannes
Floydus.


LIX. *Ioannes Henrici* Frater ætate minor, in Societate antiquior, experientiâ didicit non semper esse quæ videntur tuta: Nam vocatus ad nostrum *Oldcornum* in carcerem Wigorniensem, tenetur, neque se prece aut pretio extricare potuit Poppamo obsistente. Post annum exul, quatuor alios impendit Audomari concionando; ediditque in lucem varia ad Hæreticorum impudentiam retundendâ, magno applausu ingenij & doctrinæ. Tum rursus in Insulam rediit, & sæpius ab apparitoribus redemptus, migravit denique Louanium, Theologiæ explicandæ adhibitus; quibus in studijs, qua docendo, quâ scribendo reliquam triuit ætatem, ex hac vita repentina morte sublatus Audomari, Anno huius seculi quadragesimo nono, ætatis omnis septuagesimo septimo, Societatis quinquagesimo septimo, ab edita professione quatuor votorum quadragesimo.

Nn 4

Et hætenus

1602.

Et hæcenus quidem variarum Societatis domorum & Prouinciarum experta caritatem hæc missio Anglicana, doctorum virorum, Martyrumque fortissimorum gloriam educationemque, immortali dignam memoria animo gratissimo vnde accepta est agnoscit, & temporaria suauissimaque fouebit recordatione. Quâ ratione in posterum suis quasi nixa viribus stare capit, & aucta crevit ipsa in Prouinciam, sequentium librorum narratione exponetur, quanquam & in his ipsis quæ consecuta est incrementis, non vicinarum modo, sed & longius positarum Prouinciarum fauore & auxilio egere & vti necesse fuit, eritque non solum quamdiu sub incude persecutionis gemit, sed quamdiu Societas ipsa vna est, & ambilissimâ membrorum omnium coniunctione sibi metipla cohærens: *Pars enim si à parte dissideat, quid consequi potest nisi dolor, & interitus?*



HIS